


續名醫類案

第二十七



續名醫類案卷二十七

錢塘魏之琇編集

海昌王士雄孟英
定州楊照黎素園
同校

順症

萬密齋治羅野松年十六出痘或曰凡出痘者春夏爲順秋冬爲逆今冬出時逆也痘起發頭面要腫今被寒氣遏抑毒不得出故頭面不腫症逆也曰不然春夏爲順秋冬爲逆非以時言以症言也蓋春夏者發生長養之令也秋冬者收斂閉藏之令也痘本陽毒自出現而起發自起發而

成膿如苗而秀秀而實故曰春夏爲順如應出不出應發不發謂之陷伏故曰秋冬爲逆頭面不腫順症也頭浮腫者險症也頭面預腫者逆痘也今痘本磊落尖圓堅實其毒輕微故不腫若頂平根濶肌肉鮮紅此爲毒盛不待起發而頭面先腫矣或又曰起發太遲宜服溫補曰痘無病不須服藥此症紅潤鮮明表氣足也大小便調裏氣充也無熱無渴無他病也若補之謂之實實此症不十數日必收靨矣果不藥而安

雄案此乃千古名言

吳氏子五歲出痘起發時頂平而陷曰順症也凡出痘以氣血和平爲主尖圓堅實者氣也紅活明潤者血也紅活平

陷者血至而氣不足也。圓實而色白者氣至而血不足也。
平塌灰白者氣血俱不足也。掀腫紅綻者氣血俱有熱也。
今痘出即密時日未到氣血未週以漸起發得其常也。故
曰順症不須服藥已而果然。看痘之法盡此數語

氣虛

徐仲光治一兒痘初標於下頰腎部也形平陷氣不足也少
神血不足也六脈沈弱五朝尚暗色不起兩腿作痛便溏
有氣凝血滯之象此乃氣虛脾弱之症宜大補中氣以補
中益氣湯加蟬蛻肉桂羌活二劑而起脹繼以保元湯加



肉桂、陳皮調理，八朝溏泄不已，加木香、訶子、肉蔻治之而愈。

一兒痘起，脹頂平，而色淡白，渴瀉肢冷，喜熱飲，經曰陰寒者，飲沸湯而不知熱，又曰大寒而盛，熱之不熱，是無火也，治之宜益火之源，以消陰翳，用陳皮散，異功散，又八味丸治之而愈。

一兒痘六日稠密，形平塌，色黑滯，有擬雲掩天庭者，有擬鎖項鎖胸者，然形色雖逆，而四肢紅活綻突，唇口紅潤，起止安甯，飲食如常，二便調適，雖毒盛氣血不足，幸脾胃尚強，宜補養而兼保固，以補中益氣，加紫草、蟬蛻、牛蒡等劑，其

逆痘俱平漿破漏結痂發疔癰數處而愈。此亦氣虛血熱之證用藥甚冷

法

費養恆治一兒因內傷而吐次日見痘甚密一日絕無起勢鬆肌透表二劑不應次日以保元湯加薑桂少許二劑亦不應三日加參芪至三錢四五日畧起終頂陷囊簿七日

加參芪五錢鹿茸膏半盃仍無沛然之勢或謂邪得補而愈盛曰果爾則煩熱燥渴色蒼老礬紅矣今皮簿色白頭溫足冷症可知也乃以參芪各一兩鹿茸膏大半盞一劑即綻突如珠根紅頂白不一日漿卽肥膿其後收功不假餘力是以補爲瀉之一驗也今無是症矣。二句乃建中之言

梟毒

費建中治故友孫貞老子四歲庚寅暮春痘甚勻朗稀疎而
綻突其熱宜和其神宜爽乃躁亂乾熱頭汗如雨蓋梟毒
內擾邪火外爍也頭爲諸陽之首先賢謂毒參陽位者死
幸初見勢雖騰涌而毒尙未有定位耳大黃二錢黃連六
分石膏生地各三錢佐以地丁青皮荊芥蟬蛻木通山楂
三劑頭汗收熱勢減減石膏黃連加丹皮滑石牛蒡四劑
五朝仍壯熱紅暈如珠此痘起齊毒火盡外發也躁亂如
前而更渴大便日三四次前乃復用石膏黃連倍加生地

至九朝漿甚老而乏滋潤紅暈未淡胃氣不開熱亦未減

寐亦未安再服十二朝漸愈

救偏瑣言

嚴氏子一周痘稀朗且紅潤乃身熱如烙愁楚不堪兼顆粒

不鬆此內有伏毒也以大黃六分石膏生地各一錢半荆

芥丹皮山楂蟬蛻葛根青皮二劑大便秘三四次又二劑熱

和神定根窠亦鬆宛然順症矣有阻之者遂勿藥至八朝

仍熱叫哭失音頭面擦破身上紫滯幸未焦隱前方倍大

黃生地黃連減葛根入大桑蟲日二劑以化毒丹調油膠

脂如膏藥貼之次日痒止紅活又二劑漿足熱和十二朝

用紅花地丁生地牛蒡荆芥木通甘草連翹山楂漸愈矣



痘初似順一有伏毒便至如此餘可知矣

臧氏子八歲患痘僅存皮骨庚寅仲春見痘羸憊如此似宜
培補矣乃身熱如烙日紅如火燥渴不已溺血如膏椒紅
黯滯此梟毒挾烈火發卽內攻若不通變七日卽內潰也
以大黃四錢石膏七錢生地兩許佐以桃仁赤芍荆芥牛
蒡木通臨服和猪尾血一盞日二劑或三劑六日加黃連
自始至終一方而已約用大黃斤餘生地石膏二十餘兩
猪尾血十餘碗良以毒火猛熾苟不滌除淨盡功虧一簣矣
痘後精神煥發飲食大進肌肉生長是以瀉爲補之一驗
也

張仲文子癸未仲冬忽身熱如火神卽昏憤舌刺如煤唇口焦黑血斑無數溺色紅鮮肉瞶筋惕有如驚悸宛然悶痘斷非輕劑可挽卽用石膏一兩大黃五錢黃連三錢生地一兩佐以青皮荊芥地丁丹皮天寒稍配蜜炒麻黃五分薑一片以行之灌下卽嘔費曰毒火上衝水火搏激兩不相下故耳十餘劑見痘及見則以數記唇猶黑溺血依然至九日後黑退津生神氣漸省十二日溺血始淡胃氣日開十六日全愈服過大黃十餘兩石膏生地約二斤是早圖之一驗也

毒壅

附穢 觸

徐仲光治一兒痘。紫色而不起脹。乃毒盛壅遏也。以紫草、紅花、蟬蛻煎酒調獨聖散服之。又以犀角地黃湯治之。紅潤起脹而愈。

一見痘六日稠密紫滯平陷而不起脹。煩躁悶亂亦毒盛壅遏也。但分珠脚歛可治。以人中黃每服三分酒調連二服。色漸紅活。又以犀角地黃湯加牛蒡、蟬蛻。痘綻突起脹而愈。

一兒痘血熱重。初時純與涼血解毒。犀角服過二兩。石膏五

錢一劑者服過五劑至十朝略用參三分托漿十二朝外
漿清痲薄用助托藥加棉璽帶蛾者七枚糯米一合渴時
卽以麥冬糯米棉繭煎湯飲之又發水泡數箇漿乾暗長
灌爛遍身復用茯苓苡仁白芍黃連銀花甘草生地骨皮
山渣蓮肉木通連翹牛蒡荆芥而愈

清熱過重故元氣不能充漿所以善治者

於清熱之時卽預爲異日催漿之地庶不至打成兩槓也

萬世用云庚申春家有頑童僅十歲患痘瘡症適僕寓鄉之

故廬聞報急歸視其疾不爲不急且傍有煎炒油膩欲避

莫能荷育溪

曾世榮也

療之恰七日瘡脹而光澤偶因舍下有

動廁穢觸覺色黯而神昏大爲驚懼育溪曰毋慮吾有除

穢藥投之必安、不數日果如其言、遂拜更生、用扣其所用
何劑、曰中和湯卽十奇散、如沈檀等劑而已、餘無他巧、幼
書心

血熱

施季泉治臧玉涵次郎年十六、因新婚兼酒食、忽感痘、咸以
爲不可治、至八日、漿清寒戰、咬牙譫語、神思恍惚、咸欲進
保元湯大補之、施季泉以爲不然、改用犀角地黃湯得愈
脫痂後嘔吐大便燥結、淹延一年、繆仲淳視其舌有烈文
曰必當時未曾解陽明之毒、故有是症、以石膏二兩、人參

一兩麥冬五錢枇杷葉橘紅竹茹重便爲佐一劑卽安再劑膈中如冷物隔定只以人參投之服兩許卽索粥食晚得大便風疾頓愈

廣筆記

孫生東治鄭黃門子痘血熱大盛初起卽以犀角地黃湯治之不效至用白芍八錢一泄毒解徐補收功

同上

家弟元著一發熱卽譫語唇腫齒黑痘欲出不出醫者以爲發斑傷寒也延仲淳李泉不至予曰事急矣以生地八錢白芍五錢苓連各二錢稍加發藥日三劑勢稍定痘漸次而出又減地黃白芍之半復於助漿藥中兼清涼之劑九十朝漿始足卒傷一目醫後方大便此真血熱也若重用



解毒輕於補劑則目亦可以不眇矣。同上

黃綺雲治一兒初痘血熱甚用生地三兩煎濃汁頻飲其痘

紫立轉紅色。同上

一兒痘毒盛又遇火令用白花地丁汁和淡白酒少許服之立解。

一兒痘稠密綻突但色紫暗壯熱煩渴譫語目赤便秘乃毒火亢極也以四順清涼飲加大黃六錢微利二度其勢稍減再劑服之又利二次病去其半再以前方加人參三錢前症悉平色見淡白精神疲倦邪雖去而正氣不足宜大補之又以保元湯加芎歸芍朮而愈。

一兒痘出夏月起脹而乾紅壯熱煩渴舌燥不眠溺赤此內
外熱極也。以黃連解毒湯合化斑湯而愈。

一兒痘值六月六朝痘痛煩渴氣急便秘乃心肺實熱也。密
與涼水梨汁飲之前症悉平。

一兒痘出勻朗綻突。但枯燥而不肥澤皮膚皺揭皆屬於燥。
經曰燥勝則乾。治以養血清金潤燥之劑。又保元合四物
加麥冬治之而愈。

萬密齋治鄒氏之子。五歲出痘。或以保元湯熱益甚。或以爲
險。曰此順症也。期十八日安。不須服藥。蓋痘不可以日期
算出已盡發已透膿已滿而后收靨可期也。今痘出而熱

轉盛者出未盡也。由服保元湯犯實實之戒故令出遲。屬亦遲也。夫善攻不如善守。無他症何以藥爲已。而果愈萬子婦患痘。大熱大渴。眼紅唇裂。自利清水。妄見妄語。循衣摸牀。遍身紅班如蚊迹。皆逆症也。此毒在三焦。表裏俱熱。非大發大下之劑不可救也。乃以通聖散全料大劑與之。一服而前症悉去。痘出甚密。復用十全大補湯去桂加防風連翹銀花桔梗調理而愈。其痘自下收起亦奇事也。

一小兒痘後發熱。大小便難。瘡癍帶赤。或言虛欲用保元湯。曰不可。此實熱也。因食辛熱之物得之。果因食雞而得以三黃丸而愈。